

UMBODSMADUR ALÞINGIS

Pórshamri, Templarasundi 5, 101 Reykjavík
Sími: 510 6700 • Netfang: postur@umbodsmadur.is
Heimasíða: www.umbodsmadur.is

Mál nr. F150/2024

Reykjavík, 23. apríl 2024

Sigríður Björk Guðjónsdóttir
Ríkislögreglustjóri
Skúlagötu 21
101 Reykjavík

I

Athygli umboðsmanns Alþingis var nýlega vakin á því að lögregluembætti hefðu í notkun lögreglumerki sem ekki væru í samræmi við reglugerð nr. 1151/2011, um einkenni og merki lögreglunnar. Einkum væri um að ræða stjórnun sem birtist meðal annars á vefsíðu lögreglunnar, www.logreglan.is, á samfélagsmiðlum lögregluembætta, í skýrslum embættis yðar og á merktum lögreglubifreiðum um land allt. Þá hefur athygli umboðsmanns einnig verið vakin á því að lögreglumenn í sérsveit embættis yðar sinni skyldustörfum í einkennisfatnaði sem auðkenndur sé með lögreglumerkjum sem ekki eigi sér stoð í reglum þar um.

Í reglugerð nr. 1151/2011, sem sett var með stoð í þágildandi 40. gr. lögreglulaga nr. 90/1996, sbr. nú 43. gr. sömu laga, er fjallað um einkenni og merki lögreglunnar. Í 2. gr. reglugerðarinnar kemur fram að með lögreglumerki sé átt við sjö ólík merki en meðal þeirra er íslenska lögreglumerkið, sbr. 1. tölulið, og borði sem á er letrað „LÖGREGLAN“ eða „POLICE“, sbr. 2. tölulið. Samkvæmt 4. gr. eru umræddir borðar þannig úr garði gerðir að áletrun er gul á svörtum fleti. Samkvæmt 3. gr. reglugerðarinnar er íslenska lögreglumerkið gyllt stjarna með sex jöfnum örmum. Í greininni er lögreglumerkinu nánar lýst en þar kemur m.a. fram að umhverfis skjöld, í miðri stjórnunni, skuli vera áletrunin „MEÐ LÖGUM SKAL LAND BYGGJA“. Sú áletrun skal afmörkuð með tveimur upphleyptum hringjum og frá ytri hringnum liggi 54 teinar með jöfnu millibili út að jaðri stjórnunnar. Auk þessarar lýsingar er í reglugerðinni að finna litmynd af stjórnunni og upplýsingar um að nota skuli svartan og tilgreinda gerð guls litar.

Í reglugerð nr. 690/2021, sem sett er með stoð í sama ákvæði lögreglulaga nr. 90/1996, er einnig að finna ítarleg ákvæði um notkun íslenska lögreglumerkisins og annarra einkenna lögreglu svo og einkennisfatnað lögreglu. Í 2. gr. hennar kemur fram að með lögreglumerki í reglugerðinni sé átt við íslenska lögreglumerkið og önnur einkenni lögreglunnar og vísað til reglugerðar nr. 1151/2011. Þar kemur og fram að með einkennisfatnaði lögreglu sé átt við þann fatnað sem ríkislögreglustjóri hafi samþykkt til notkunar hjá lögreglu. Í 5.

gr. reglugerðarinnar er fjallað um almennan lögreglufatnað. Í 1. mgr. kemur meðal annars fram að lögreglumerki séu á báðum ermum og á baki og hægra megin á brjósti sé merkið „Lögreglan“ en vinstra megin á brjósti merkið „Police“. Þar segir einnig að lögreglustjóra sé í sérstökum tilvikum heimilt að merkja einnig með merkinu „Police“ á baki. Í 2. mgr. segir að notkun annarra merkja eða tákna á einkennisfatnað eða búnað lögreglu sé óheimil nema heimiluð sé sérstaklega samkvæmt reglugerðinni eða reglum settum af ríkislögreglustjóra.

Í báðum reglugerðunum er kveðið á um að öllum öðrum en lögreglu sé óheimilt að nota einkenni, merki og/eða einkennisfatnað lögreglu opinberlega eða í ólögmatum tilgangi, eða einkenni/merki eða fatnað sem er svo áþekkur þeim er lögregla notar, að hætta sé á að á verði villst. Jafnframt er bent á að brot á ákvæðum reglugerðanna geti varðað refsingu samkvæmt 117. gr. almennra hegningarlaga nr. 19/1940, sbr. 1. mgr. 1. gr. reglugerðar nr. 1151/2011 og 1. mgr. 3. gr. reglugerðar nr. 690/2021.

II

Sú lögreglustjarna sem nú virðist hafa verið tekin í notkun hjá lögreglunni virðist hvorki vera sú sem lýst er í 3. gr. reglugerðar nr. 1151/2011 né vera meðal þeirra sjö merkja sem teljast lögreglumerki samkvæmt 2. gr. hennar. Í því efni nægir að benda á að hún er ekki með ofangreindri áletrun, hún er ekki í sömu litum og hefur ekki að geyma 54 teina.

Á ljósmyndum af lögreglumönnum í sérsveit embættis yðar, sem birst hafa í fjölmiðlum, sést að þeir eru merktir með grárri lögreglustjörnu á ermum einkennisfatnaðar. Þá verður einnig séð að í sama lit hafi verið notaðir borðar með áletruninni „LÖGREGLAN“ og „POLICE“ en í 4. gr. reglugerðar nr. 1151/2011 kemur fram að áletrun skuli vera í gulum lit tiltekinnar gerðar á svörtum fleti. Að síðustu eru þess dæmi að á einkennisfatnaði lögregluþjóna í umræddri sérsveit sé annað merki, sem ekki er að finna í ofangreindum reglugerðum, en því má lýsa sem ávölu merki með útlínur Íslands í miðjunni en út frá hvorri hlið liggja nokkurs konar vængir.

Ljóst er af fyrrgreindum ákvæðum reglugerða nr. 1151/2011 og 690/2021 að ítarlegar reglur gilda um einkenni og merki lögreglunnar svo og notkun þeirra. Þá getur legið refsing við notkun merkja og einkenna lögreglu eða svipaðra merkja við ákveðnar aðstæður. Búa að baki þessu sjónarmið um að almenningur geti áttað sig á því hverjir fara með lögregluvald hverju sinni, sbr. til hliðsjónar bréf umboðsmanns Alþingis 15. ágúst 2023 í máli nr. F139/2023.

III

Með hliðsjón af öllu framangreindu, svo og því samræmingarhlutverki sem embætti yðar hefur að gegna vegna starfsemi lögreglunnar, sbr. m.a. d- og g-lið 1. mgr. 5. gr. lögreglulaga nr. 90/1996, er þess óskað með